

Curriculum Vitae di Edgar Joaquin Watty Vos

Edgar Joaquin Vos, mihor conoci como Watty Vos a nace na Aruba dia 16 di augustus 1937 for di e matrimonio di Salomon y Genovita Vos, un famiaconsistiendo di 5 jui. Watty tabata casa cu Tibisay Urena y tin dos jui, Edgar Salomon y Sally Genoveva.

Watty tin diplomadi MULO-Adjunctcommiezen y Advocatendiploma manera prescribi den e Advocatenlandsverordening 1959. Na December 1970 Watty a wordo admiti como

miembro di Balie di Antiyas Hulandes. Y como abogado Watty a labora cu e oficina di abogado di Gonzalez, Zielinsky y Gibbs.

Watty a demostra hopi interes den e sucedidonan social aki na Aruba. Asina tambe Watty tabata presidente di e sindicato ANAAB, cual awendia ta SEPA. Watty tabata fundador y musico di e famoso banda di anjanan '50 Los Duques. Banda di tur esakinan Watty tabata sa di mantene su mes hopi ocupa cu e organisashon internacional

Jaycees, seccion Aruba, cual e la yega hasta di fungi como su presidente. Pero Watty su amor mas grandi tabata deporte, pa ser mas especifico futbol. Watty tabata hungador di Aruba Jrs, miembro na varios ocaшон di e seleccion di Antiyas Hulandes cu a participa den varios weganan tanto di CONCACAF, Panamericano, y otro weganan tanto nashonal como internacional.

Nos tur por corda durante e ultimo campanja na 1997 e celebracion grandi cu tabata tin banda di cas di Watty pa e hecho cu e tabata tin 26 anja den politica. Un trayectoria sin igual cu ta pone su persona destaca den comunidad.

Watty a haci su debut den politica na anja 1971 ora cu su persona hunto cu Betico a funda partido MEP. Desde debut di Watty den politica y te na elecshon di 1997 cual tabata e ultimo elecshon cu Watty a participa, semper e la wordu escogi cu votonan preferencial.

Politica e carera cu a bira un forma di bida pa Watty, unda e la dedica tur su esfuersonan pa mehora e calidad di bida di cada un cu ta forma parti di pais Aruba. Na anja 1971 Watty a wordu elegi y a bira miembro di eilandsraad di Aruba, cual funshon e la mantene te 1973.

Na December 1973 Watty a keda nombra como Ministro di Justicia y alavez vice Prome Ministro di Antiyas den Gabinete di Juancho Everts, cual posicion el a mantene te 1975. Na luna di September 1975 el a keda nombra como presidente di e delegashon di Reino pa e negociacionnan entre Reino y Republica di Venezuela encuanto e futuro di e bareranan maritimo entre Venezuela y Reino Hulandes. Despues di esaki pa motibo di principio, pa cual Watty semper tabata conoci pele a sali for di partido MEP.

Di mei 1976 pa februari 1977 e tabata diputado y despues el a bira miembro di eilandsraad. E mesun anja Watty a dicidi di lanta su partido, RUBA, y tabata miembro di eilandsraad di Aruba te cu 1985.

Na 1982 partido RUBA a uni forza cu partido AVP, y na 1985 pa efectua e Status Aparte di Aruba Watty tabata den e gobierno transitorio como diputado. Den e prome gobierno despues di Status Aparte di



Aruba, esta Gabinete Eman I, Watty a keda nombra como Ministro di Justicia y Deporte, cual posicion e la mantene te cu februari 1989, ora cu Gobierno a cai. Di februari 1989 te cu augustus 1994 Watty tabata miembro di Parlamento den oposishon y desde prome di September 1994 el a wordo apunta como Ministro di Justicia y Obranan Publico. Na 1998 e la bolbe wordo apunta como tal, esta Ministro di Justicia y Obranan Publico, cual posishon e la ocupa te na su fayecimiento dia 6 januari 2001.

Mas ainda Watty tabata miembro di e comishon di Reino, Comishon di Antiyas y e delegashon Arubano na dos conferencia di mesa rondo, na 1981 y 1983, un comishon cu tabata tin e tarea di formula e futuro di e status di Aruba den Reino Hulandes.

Desde oktober 2000 Watty tabata presidente di e Caribbean Financial Action Task Force. Na 1980 Watty a wordo condecora como Ridder in de Orde van de Nederlandse Leeuw y na 1990 promovi pa Commandeur in de Orde van Oranje Nassau. Tambe Gobierno Venezolano a demostra nan respet y admirashon pa Watty dor di condecora cu un Orden de Francisco de Miranda.

Tambe tin hopi frase y lema cu a haci Watty hopi popular sea durante su discursonan, entrevista, reunion tambe como

den combersashon priva pa asina tur hende por a comprende facilmente su pensamneto. Siquientemente algun di e frasenan: "Pa bo por ta mihor cu mi, bo mester lanta prome cumi y drumi despues dimi"

"No ta e golpi cu bo dal ta determina bo forza, pero ta e golpi cu bo por absorba ta determina esey"

"Si bo no sa landa, no bay lama"

"E compromiso di un politico ta, di no priminti, pero di compromete y di cumpli cu su pueblo"

"Si laman seca berquenza ta pa Dios"

"Politica ta mescos cu un wega di futbol, si abo no score, bo por tin sigur cu bo oponente si lo score bo"

"No tuma mi amabilidad pa debilidad"

"Mihor bo keda cu bo boca cera y aparenta cu ta bobo bo ta, cu habri bo boca y demostra ta con bobo bo ta"

"Mi no ta e persona di mas sabi di mundo, pero un cos si mi sa, mi no ta e persona di mas bobo"

"I know where I'm going to, but I never will forget where I came from"

"There is no progress without struggle"

Aruba y Reino Hulandes henter lo keda recorda Watty como un persona cu no tabata keda satisfecho cu solamente alcanza e reto, pero pa haci esaki semper den un gran forma. "Watty pa Semper"

